


CELEBRACIÓN EN OS COTOS (na casa)

24 – 25 de outubro do 2020

XXX DO TEMPO ORDINARIO



NON MÁIS
VIOLENCIA
DE XÉNERO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INJUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1

1.- ENCONTRO EN FAMILIA

SAÚDO DE BENVIDA

🎵 *Amigos nas penas*

Celebrante:

Benvidos sexamos todos a esta celebración. Reunímonos para compartir a fe en familia, e facémolo no nome do Pai e do Fillo e do Espírito Santo.

Con todo o barullo que temos ao noso arredor moitas veces deixamos pasar o máis importante, así nos pasa tamén neste momento de pandemia que estamos a vivir.

Xesús hoxe no evanxeo vainos amosar o que é verdadeiramente vale a pena cando lle preguntan polo mandamento máis importante:

- para Xesús tan importantes son o amor ás persoas como o é o amor a Deus.

O amor a Deus e ao próximo é o noso mandamento máis importante, por iso hoxe e sempre temos que estar atentos e coidadosos para ser responsables uns dos outros.

Participemos na celebración que nos propón Xesús tendo en conta que o básico e fundamental na nosa vida son os demais, xa que eles son a imaxe verdadeira de Deus, como nos dicía esta semana o Papa Francisco.

2

ACTO PENITENCIAL E COMPROMISOS

Celebrante: *É preciso atopar en todas as persoas a imaxe de Deus, como facía Xesús que non se paraba nas aparencias. Comprometémonos a vivir como familia a irmandade que Xesús pon no medio de nós. Comprometémonos e pedimos perdón:*

Monitor/a

➤ **Comprometédesvos a vivir sendo coherentes nas palabras e nos feitos que poñen a Deus e aos demais como “primeiro mandamento”?**

SÍ, COMPROMETÉMONOS

➤ **Comprometédesvos a vivir colaborando con todos os nosos veciños e veciñas que se esforzan por ser irmáns en comunidade?**

SÍ, COMPROMETÉMONOS

➤ **Comprometédesvos a vivir no respecto ás persoas, aínda que pensen, vivan ou crean diferente?**

SÍ, COMPROMETÉMONOS

Celebrante: *Deus todopoderoso teña piedade de nós e dos que teñen lugar no noso corazón e nosa vida. A todos o Señor nos conceda o perdón e nos leve á vida eterna. Amén.*

ORACIÓN PROPIA DO DÍA

Celebrante: *Presentámoslle a Deus Pai os nosos desexos para cumprir co seu mandato de amor. Damos grazas polos familiares que máis nos teñen amado na vida.*

(silenzo)

Deus, Noso Pai,
aumenta en nós a fe, a esperanza e a caridade.
Para que poidamos acadar o que nos prometes,
fainos amar o que nos mandas.

Pedímoscho polo mesmo Xesucristo,
sabendo que el viviu no medio de nós
valorando as persoas, non polo que teñen,
senón polo que son.

El que vive e reina por sempre eternamente. Amén

2.- PROCLAMACIÓN DA PALABRA DE DEUS

(sentad@s)

Monitor/a: *Xa no Libro do Éxodo se nos mandaba o amor a Deus e aos irmáns, pero moitas veces deixouse de lado este mandamento pondo como primeiro o amor a nós mesmos.*

Amar a Deus “con todo o corazón, con toda a alma e con toda a mente” leva consigo amar a quen é a súa verdadeira imaxe ante nós. “Como podemos dicir que amamos a Deus a quen non vemos se non amamos ao próximo a quen si vemos”.

LECTURA DO LIBRO DO ÉXODO

Di o Señor:

Non aflixirás nin asoballarás os forasteiros, pois forasteiros fostes vós en terras de Exipto.

Non oprimirás as viúvas nin os orfos. Se de feito os oprimes, e eles se queixan a min, eu escoitarei certamente a súa queixa. O meu noxo acenderase e fareivos morrer a espada. As vosas mulleres quedarán viúvas e os vosos fillos orfos.

Se lle emprastas diñeiro a un do meu pobo, ao pobre que vive onda ti, non te portarás coma un usureiro, cobrándolle intereses. Se tomas en peñor o manto do teu próximo, antes de poñerse o sol devolverasllo, pois é o vestido que ten para cubrir o seu corpo. Con que, se non, se taparía ao deitarse? Se se queixa a min, escoitareino, porque eu son misericordioso.

Palabra do Señor

♪ *Na tardiña baixa da vida*

PROCLAMACIÓN DO SANTO EVANXEO SEGUNDO MATEO

Daquela os fariseos, ao se informaren de que Xesús lles tapara a boca aos saduceos, reuníronse; e un deles, que era xurista, preguntoulle para poñelo a proba:

- Mestre, cal é o mandamento máis importante da Lei?

Xesús respondeulle:

- "Amarás o Señor, o teu Deus, con todo o teu corazón, con toda a túa alma e con todo o teu entendemento. Este é o mandamento primeiro e máis grande. O segundo é semellante a el: Amarás o teu próximo coma a ti mesmo. Destes dous mandamentos dependen a Lei enteira e mailos profetas.


Palabra do Señor

(**sentad@s**) gardamos uns instantes de silencio para acoller a palabra no corazón



Que é amar a Deus:

- é amar nunhas relacións familiares respectuosas, no compartir de parella, no esforzo de encamiñar aos fillos, no agarimo de coidar aos maiores que o deron todo
- amar a Deus é amar no coidado da terra e da natureza que nos rodea; reciclando, reutilizando, reducindo o que consumimos
- amar a Deus é amar na preocupación e no dar unha man ás persoas que máis difícil, xa sexan emigrantes, refuxiados, ou mulleres que malviven na violencia por seren mulleres.
- amar a Deus é amar e non calar as incoherencias nunha igrexa que moitas veces se enche de ritos e rutinas baleiras
- amar a Deus é amalo en cada rostro, en cada mirada, en cada aperta, sen importar que se pense, viva ou crea diferente



(en pé)

PROFESIÓN DA FE

Celebrante: *Neste encontro familiar, queremos ser coherentes co amor que nos propón Xesús cara a todos por iso damos resposta da nosa fe dicindo:*

Creo, Señor, pero aumenta a miña fe

Monitor/a

***Credes en Deus Pai e Nai,
que nos creou á súa imaxe e semellanza enchéndonos de amor?***

Creo, Señor, pero aumenta a miña fe

***Credes en Xesús,
que nos convida a ter a Deus e aos demais coma o importante e “primeiro mandamento” na vida de cada día?***

Creo, Señor, pero aumenta a miña fe

***Credes no Espírito Santo
que alenta a colaborar construíndo unha sociedade transparente e honrada que se esforza pola dignidade de toda persoa?***

Creo, Señor, pero aumenta a miña fe

***Credes na igrexa,
comunidade que necesita das nosas mans, dos nosos traballos, dos nosos esforzos polos máis esquecidos, para sermos unha familia de irmáns?***

Creo, Señor, pero aumenta a miña fe

ORACIÓN UNIVERSAL

Celebrante: *Oremos xuntos, con confianza naquel que nos ensina a amar sen distinción de persoas. Dicimos:*

Acolle, Señor, a nosa oración

Monitor/a

- ✓ Pedímosche Señor para que no medio de cada familia aniñen actitudes e comportamentos acolledores da dignidade que puxeches en cada persoa, oremos
- ✓ Pedímosche Señor para que nas nosas comunidades non esquezamos nunca que a salvación só será posible se somos capaces de amarte amando aos demais coma irmáns, especialmente aos máis esquecidos, oremos
- ✓ Pedímosche Señor para que, como familia, nos deixemos guiar da man de Xesús respectando a dignidade das persoas, especialmente das que menos teñen e máis necesitan de nós, oremos
- ✓ Pedímosche Señor polas persoas que están enfermas para que se sintan nas túas mans de Pai, e para que conten coas nosas mans de irmáns, oremos

Celebrante: *Grazas Señor por acoller as nosas preocupacións e desexos axudándonos a vivir no amor a Ti e ao próximo. Ti que vives e reinas por sempre eternamente. Amén.*

3.- OS SIGNOS DA COMUÑÓN CON DEUS EN FAMILIA

NOSO PAI

Celebrante: *A Deus Pai presentámoslle agora a nosa oración como nos ensinou Xesús, por iso en familia lle dicimos:*

NOSO PAI ...

SIGNO DA PAZ

Celebrante: *Nestes momentos de pandemia non podemos darnos a paz como quixéramos, pero si podemos ter un xesto ou unha mirada de aprecio para quen está máis preto de nós. Así mostramos o noso desexo de que teña paz no seu corazón e na súa vida.*

NON COMULGAMOS

PERO ESTAMOS EN COMUÑÓN

Celebrante: *Rezar xuntos é signo do amor que Xesús nos ten e nos trae para compartir con todos. Participemos hoxe desta fe comprometéndonos a construír o mundo de irmandade desexado por Xesús no que o máis importante son as persoas.*

Ditosos nós que hoxe somos convidados a vivir o primeiro e gran mandamento dende este noso fogar.

 **Acharte presente na vida**

4.- AVISOS E DESPEDIDA

ORACIÓN FINAL

Celebrante:

Oremos: Señor,
que a fe realice en nós o que significa.
Fai que sexa un día realidade para nós
o que agora compartimos.
Axúdanos a medrar, esforzándonos día a día,
por facer que Ti e os demais
sexades o primeiro mandamento da nosa vida.
Ti que vives e reinas por sempre eternamente. Amén.

*Con Xesús queremos abrir os ollos para ver a Deus Pai
en cada rostro,*

*Con Xesús queremos ter un trato acolledor, xusto e
digno cos demais procurando sempre unhas relacións
humanas baseadas na igualdade e no respecto*

*Con Xesús queremos que a nosa comunidade de Os
Cotos sexa sempre unha parroquia aberta a todos, e dun
xeito especial para con aqueles que máis precisan que se
recoñeza a súa dignidade de persoa.*

***Que teñamos un bo día, unha boa semana,
e o Señor nos bendiga, † nos garde de todo mal
e nos leve ao seu fogar de vida eterna. Amén.***



**“O primeiro e máis grande mandamento,
é amar a Deus e ao próximo como a un mesmo”**

Palabras de Xesús do evanxeo de hoxe.